

T 2511
8248

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

十
之
九

宗室傳第三

通志八十

晉

安平獻王孚

子邕

邕弟義陽成王望

洪弟隨穆王整

整弟竟陵王棼

望弟太原成王輔

輔弟翼

翼弟下邳獻王晃

晃弟太原列王瓌

瓌弟高陽元王珪

珪弟常山孝王衡

衡弟沛順王景

彭城穆王權

子元王植

植子康王釋

高密文獻王泰

子孝王略

略兄新蔡武哀王騰

范陽康王綏

子虓

綏子保

譙剛王遜

子閔王承

承子烈王無忌

無忌子敬王恬



韓延之

高陽王睦

任城景王陵弟順

宣五王

平原王幹

琅邪武王伷伷子武陵莊王澹 澹弟東安王 繇 繇弟淮陵王滸

清惠亭侯京

扶風武王駿子暢 暢弟新野 莊王猷 梁孝王彤

文六王

齊獻王攸子蕤 贊 寔

城陽哀王兆

遼東悼惠王定國

廣漢敬王不修

樂安平王鑒

樂平王延祚

惠帝愍懷太子適子胤 尚 臧

八王

汝南文成王亮子粹 矩 兼 宗 熙 楚隱王瑋

趙王倫 齊王固

長沙厲王乂 成都王穎

河間王顥 東海孝獻王越

武十三王

毗陵悼王軌

秦獻王柬

城陽懷王景

東海沖王祗

始平哀王裕

淮南忠壯王允

代哀王演

新都王該

清河康王遐

汝陰哀王謨

吳敬王晏

渤海殤王恢

元四王

琅邪孝王衷

東海哀王沖

武陵威王晞

子璿

琅邪悼王焜

簡文三王

會稽思世子道生

臨川獻王郁

會稽文孝王道子

子元顯

安平獻王孚字叔達宣帝次弟也初孚長兄朗字伯達

宣帝字仲達孚弟熹字季達惲字顯達進字惠達通字

雅達敏字幼達俱知名故時號為八達焉孚溫厚廉讓

博涉經史漢末喪亂與兄弟處危亡之中簞食瓢飲而

披閱不勸性通恕以貞白自立未嘗有怨於人陳留殷

武有名於海內嘗推罪譴字往省之遂與同處分食談

者稱焉魏陳思王植有俊才清選官屬以孚爲文學掾
植負才陵物孚每切諫初不合意後乃謝之遷太子中
庶子魏武帝崩太子號哭過甚孚諫曰大行晏駕天下
侍殿下爲命當上爲宗廟下爲萬國柰何效匹夫之孝
乎太子良久乃止曰卿言是也時羣臣初聞帝崩相聚
號哭無復行列孚厲聲於朝曰今大行晏駕天下震動
當早拜嗣君以鎮海內而但哭邪孚與尚書和洽罷群
臣備禁衛具喪事奉太子以即位是爲文帝時當選侍
中常侍等官太子左右舊人頗諷諭主者便欲就用不

調餘人孚曰雖有堯舜必有稷契今嗣王新立當進用
海內英賢猶患不得如何欲因際會自相薦舉邪官失
其任得者亦不足貴遂更他選轉孚爲中書郎給事常
侍宿省内除黃門侍郎加騎都尉時孫權稱藩請送任
子當遣前將軍于禁還久而不至天子以問孚孚曰先
王設九服之制誠以要荒難以德懷不以諸夏禮責也
陛下承緒遠人率貢權雖未送任子于禁不至猶宜以
寬待之畜養士馬以觀其變不可以嫌疑責讓恐傷懷
遠之義自孫策至權弈世相繼惟疆與弱不在一禁禁

之未至當有他故耳後禁至果以疾遲留而任子竟不
至大軍臨江責其違言吳遂絕不貢獻後出為河內典
農賜爵關內侯轉清河太守初魏文帝置度支尚書專
掌軍國支計朝議以征討未息動須節量及明帝嗣位
欲用孚問左右曰有兄風不答云似兄天子曰吾得司
馬懿二人復何憂哉轉為度支尚書孚以為擒敵制勝
宜有備豫每諸葛亮入寇關中邊兵不能制敵中軍奔
赴輒不及事機宜預選步騎二萬以為二部為討賊之
備又以關中連遭賊寇穀帛不足遣冀州農丁五千屯

於上邽秋冬習戰陣春夏脩田桑由是關中軍資有餘待
賊有備矣後除尚書右僕射進爵昌平亭侯遷尚書令及
大將軍曹爽擅權李勝何晏鄧颺等亂政孚不視庶事但
正身遠害而已及宣帝誅爽孚與景帝屯司馬門以功進
爵長社縣侯加侍中時吳將諸葛恪圍新城以孚督諸
軍二十萬防禦之孚次壽春遣毋丘儉文欽等進討諸
將欲速擊之孚曰夫攻者借人之力以為功且當詐巧
不可爭力也故稽留月餘乃進軍吳師望風而退魏明
悼后崩議書銘旌或欲去姓而書魏或欲兩書孚以為

經典正義皆不應書凡帝王皆因本國之名以爲天下之號而與往代相別耳非爲擇美名以自光也天稱皇天則帝稱皇帝地稱后土則后稱皇后此乃所以同天地之大號流無二之尊名不待稱國號以自表不俟稱氏族以自彰是以春秋隱公三年經曰三月庚戌天王崩尊而稱天不曰周王者所以殊乎列國之君也八月庚辰宋公和卒書國稱名所以異乎天王也襄公十五年經曰劉夏逆王后于齊不云逆周王后姜氏者所以異乎列國之夫人也至乎列國則曰夫人姜氏至自齊

又曰紀伯姬卒書國稱姓此所以異乎天王后也由此考之尊稱皇帝赫赫無二何待於魏乎尊稱皇后彰以謚號何待於姓乎議者欲書魏者此以爲天皇之尊同於往古列國之君也或欲書姓者此以爲天皇之后同於往古之夫人也乖經典之大義異乎聖人之明制非所以垂訓將來爲萬世不易之式者也遂從乎議遷司空代王凌爲太尉及蜀將姜維寇隴右雍州刺史王經戰敗遣孚西鎮關中統諸軍事征西將軍陳泰與安西將軍鄧艾進擊維維退孚還京師轉太傅及高貴鄉公遇

害百官莫敢奔赴孚枕尸於股哭之慟曰殺陛下者臣之罪奏推主者會太后令以庶人禮葬孚與群公上表乞以王禮葬從之孚性至慎宣帝執政常自退損後逢廢立之際未嘗豫謀景文二帝以孚屬尊亦不敢逼後進封長樂公及武帝受禪陳留王就金墉城孚拜辭執王手流涕歔歔不能自勝曰臣死之日固大魏之純臣也詔曰太傅勲德弘茂朕所瞻仰以光導弘訓鎮靜宇內願奉以不臣之禮其封爲安平王邑四萬戶進拜太宰持節都督中外諸軍事有司奏諸王未之國者所置官

屬權未有備帝以孚明德屬尊當宣化樹教爲群后作則遂備置官屬焉又以孚內有親戚外有交游惠下之費而經用不豐奉絹二千匹及元會詔孚乘輿車上殿帝於阼階迎拜旣坐帝親奉觴上壽如家人禮帝每拜孚跪而止之又給以雲母輦青蓋車孚雖見尊寵不以爲榮常有憂色臨終遺令曰有魏貞士河內溫縣司馬孚字叔達不伊不周不夷不惠立身行道終始如一當以素棺單槨歛以時服泰始八年薨時年九十三帝於太極東堂舉哀三日下詔傷悼賜東園溫明祕器朝服

一具衣一襲緋練百匹絹布各五百匹錢百萬穀千斛以供喪事諸所施行皆依漢東平獻王蒼故事其家遵孚遺旨所給器物一不施用帝再臨喪親拜盡哀及葬又幸都亭望柩而拜給鸞輅輕車介士虎賁百人吉凶導從二千餘人前後鼓吹配享太廟子九人邕望輔翼晁瓌珪衡景邕字子魁初爲世子拜步兵校尉侍中先孚卒追贈輔國將軍謚曰貞邕子崇爲世孫又早夭泰始九年立崇弟平陽亭侯隆爲安平王立四年咸寧二年薨謚曰穆無子國絕邕弟義陽成王望字子初出繼

伯父朗寬厚有父風仕郡上計吏舉孝廉辟司徒掾歷平陽太守洛陽典農中郎將從宣帝討王凌以功封永安亭侯遷護軍將軍改封安樂鄉侯加散騎常侍時魏高貴鄉公好才愛士望與裴秀王沈鍾會並見親待數侍宴筵公性急秀等居內職有急召便至以望外官特給追鋒車一乘虎賁五人時景文相繼輔政未嘗朝覲權歸晉室望雖見寵待每不自安由是求出爲征西將軍持節都督雍涼二州諸軍事在任八年威化明肅先是蜀將姜維屢寇關中及望至廣設方畧維不得爲寇

關中賴之進封順陽侯徵拜衛將軍領中領軍典禁兵
尋加驃騎將軍開府頃之代何曾為司徒武帝受禪封
義陽王邑萬戶給兵三千人泰始三年詔進位太尉中
領軍如故置太尉軍司一人參軍事六人騎司馬五人又
增置官騎十人并前三十假羽葆鼓吹吳將施績寇江
夏邊境騷動以望統中軍步騎二萬出屯龍陂為二方
重鎮假節加大都督諸軍事會荊州刺史胡烈距績破
之望乃班師俄而吳將丁奉寇芍陂望又率諸軍以赴
未至而奉已退拜大司馬孫皓率衆向壽春詔望統

中軍二萬騎三千據淮北皓退軍罷泰始七年薨時年
六十七賻贈有加望性儉吝而好聚斂身士之後金帛
盈溢以此獲譏四子弈洪整楸弈至黃門郎先望卒整
亦早亡以弈子竒襲爵竒亦好蓄聚不知紀極遣三部
使到交廣商貨為有司所奏太康九年詔貶為三縱亭
侯更以章武王威為望嗣後威誅復立竒為棘陽王以
嗣望望子河間平王洪字孔業出繼叔父昌武亭侯遺
仕魏歷位典農中郎將原武太守封襄賁男武帝受禪
封河間王立十二年咸寧二年薨二子威混威嗣徙封

章武其後威繼義陽王望更立混爲洪嗣混歷位散騎常侍薨及洛陽陷混諸子皆沒於胡而小子滔初嗣新蔡王確亦與其兄俱沒後得南還與新蔡太妃不協太興二年上疏以兄弟並沒在遼東章武國絕乞還所生太妃訟之事下太常太常賀循議章武新蔡俱承一國不絕之統義不得替其本宗而先後傍親按滔旣已被命爲人後矣必須無復兄弟本國求絕然後得還所生今兄弟在遠不得言無道理雖阻復非絕域且鮮卑恭命信使不絕自宜詔下遼東依劉群盧湛等例發遣令

還繼嗣本封謂滔今未得便委離所後也元帝詔曰滔雖出養自有所生母新蔡太妃相待甚薄滔執意如此如其不聽終當紛紜更爲不可今便順其所執還襲章武滔歷位散騎常侍薨子休嗣休與彭城王雄俱奔蘇峻峻平休已戰死弟珍時年八歲以小弟坐咸和六年襲爵位至太宗正薨無嗣河間王欽以子範之繼位至游擊將軍薨子秀嗣義熙元年爲桂陽太守秀妻桓振之妹振作逆秀不自安謀反伏誅國除威字景曜初嗣洪咸寧三年徙封章武太康九年嗣義陽王望威凶暴

無操行諂附趙王倫元康末為散騎常侍倫將篡使威
與黃門郎駱休逼帝奪璽綬倫以威為中書令倫敗惠
帝反正曰阿皮換吾指奪吾璽綬不可不殺阿皮威小
字也於是誅威洪弟隨穆王整兄弈卒以整為世子歷
南中郎將封清泉侯先父望薨追贈冠軍將軍武帝以
義陽國一縣追封為隨縣王子邁嗣太康九年以義陽
之平林益邁為隨郡王整弟竟陵王楙字孔偉初封樂
陵亭侯起家參相國軍事武帝受禪封東平王邑三千
九十七戶入為散騎常侍尚書楙善諂諛曲事楊駿及駿

誅依法當死東安公繇與楙善故

不坐尋遷大鴻臚

加侍中繇欲擅朝政與汝南王亮

平亮託以繇討駿

顧望免繇楙等官遣楙就國楙遂

負財奢僭踰制趙王

倫篡位召還及義兵起倫以楙為

將軍都督諸軍事

倫敗楙免官齊王固輔政繇復為

射舉楙為平東將

軍都督徐州諸軍事鎮下邳成都

穎輔政進楙為衛

將軍會惠帝北征即以楙為車騎

軍都督如故使率

衆赴鄴蕩陰之役東海王越奔于

邳楙不納越乃還

國帝既西幸越總兵謀迎大駕楙

用長史王脩計舉

徐州以讓越乃自承制都督兗州刺史車騎將軍表於天子時帝在長安遣使者劉虔即拜焉楸慮兗州刺史苟晞不避已乃給虔兵使稱詔誅晞晞時已避位楸在州徵求不已郡縣不堪命范陽王虓遣晞還兗州徙楸都督青州諸軍事楸不受命皆山東諸侯與豫州刺史劉喬相結虓遣將田徽擊楸破之楸走還國帝還洛陽楸乃詣闕及懷帝踐阼改封竟陵王拜光祿大夫越出牧豫州留世子毗及其黨何倫防察宮省楸白帝討越乃合衆襲倫不尅帝委罪於楸楸奔竄獲免越薨乃出

及洛陽傾覆爲亂兵所害弟太原成王輔魏末爲野王太守武帝受禪封渤海王邑二千三百七十九戶泰始二年之國後爲衛尉出爲東中郎將轉南中郎將咸寧三年徙爲太原王監并州諸軍事太康四年入朝五年薨追贈鎮北將軍後更贈衛將軍開府儀同三司子弘立元康中爲散騎常侍後徙封中丘王三年薨子鑠立輔弟翼字子世少歷顯位官至虎賁中郎將武帝未受禪而卒以兄邑之支子承爲嗣封南宮縣王薨子祐嗣立承遂無後翼弟下邳獻王晃字子明魏武封始亭

侯拜黃門侍郎改封西安男出爲東莞太守武帝受禪封下邳王邑五千一百七十六戶泰始二年就國是孝友貞廉謙虛下士甚得宗室之稱後爲長水校尉南中郎將九年詔晃爲使持節都督寧益二州諸軍事安西將軍領益州刺史晃以疾不行更拜尚書遷右僕射久之出爲鎮東將軍都督青徐二州諸軍事惠帝即位入爲車騎將軍加散騎常侍將誅楊駿以晃領護軍屯東掖門尋守尚書令遷司空加侍中令如故咸寧六年薨追贈太傅二子哀綽哀早卒綽有篤疾別封良成縣王以太原

王輔第三子韓爲嗣官至侍中尚書早薨子韶嗣晃弟太原烈王瓌字子泉魏長樂亭侯改封貴壽鄉侯歷振威將軍祕書監封固始子武帝受禪封太原王邑五千四百九十六戶泰始二年就國四年入朝賜袞冕之服遷東中郎將十年薨詔書追悼贈前將軍子顯立徙封河間王別有傳瓌弟高陽元王珪字子璋少有才望魏高鄉侯歷河南令進封滎陽子拜給事黃門侍郎武帝受禪封高陽王邑五千五百七十戶歷北中郎將督鄴城守諸軍事泰始六年入朝以父孚年高乞留供養拜尚

書遷右僕射十年薨詔遣兼大鴻臚持節監護喪事贈車騎將軍儀同三司珪有美譽於世而帝甚悼惜之無子詔以太原王輔子緝襲爵緝立五年咸寧四年薨謚曰哀無子太康二年詔以太原王瓌世子顥子訟為緝後封真定縣侯珪弟常山孝王衡字子平魏封德陽鄉侯進封汝陽子為駙馬都尉武帝受禪封常山王邑三千七百九十戶二年薨無子以安平世子邕第四子敷為嗣衡弟沛順王景字子文魏樂安亭侯歷諫議大夫武帝受禪封沛王邑三千四百戶立十一年咸寧元年

薨子鞠立

彭城穆王權字子輿宣帝弟魏魯相東武城侯植之子也初襲封拜冗從僕射武帝受禪封彭城王邑二千九百戶出為北中郎將都督鄴城守諸軍事泰始中入朝賜衣冕之服咸寧元年薨子元王植立歷位後將軍尋拜國子祭酒太僕卿侍中尚書出為安東將軍都督揚州諸軍事代淮南王允鎮壽春未發或云植助允攻趙王倫遂以憂薨贈車騎將軍增封萬五千戶子康王釋立官至南中郎將持節平南將軍分魯國蕃薛二縣以

益其國凡二萬三千戶薨子雄立坐奔蘇峻伏誅更以
釋子紘嗣紘字偉德初封堂邑縣公建興末元帝承制
以紘繼高密王據及帝即位拜散騎侍郎遷翊軍校尉
前將軍雄之誅也紘入繼本宗拜國子祭酒加散騎常
侍尋遷大宗正祕書監有風疾性理不恒或欲上疏陳
事歷示公卿又杜門讓還章印貂蟬著杜門賦以顯其
志由是更拜光祿大夫領大宗師常侍如故後疾甚馳
騁無度或攻劫軍寺或打傷官屬醜言悖詈誹謗上下
又乘車突入端門至太極殿前爲御史中丞車灌奏劾

成帝詔解紘常侍光祿宗師先所給車牛皆錄取賜米
布牀帳以養疾咸康八年薨贈散騎常侍金紫光祿大
夫二子玄俊玄嗣立坐匿戶爲桓溫所表收付廷尉旣
而宥之位至中書侍郎薨子弘之立位至散騎常侍薨
子邵之立薨子崇之立薨子緝之立宋受禪國除恭王
俊字道度出嗣高密王略官至散騎常侍子敬王純之
立歷臨川內史司農少府卿太宰右長史薨子恢之立
義熙末以給事中兼太尉脩謁洛陽園陵宋受禪國除
高密文獻王泰字子舒彭城穆王權之弟魏陽亭侯補

陽翟令遷扶風太守武帝受禪封隴西王邑三千二百戶拜游擊將軍出爲兖州刺史加鷹揚將軍遷使持節都督寧益二州諸軍事安西將軍領益州刺史稱疾不行轉安北將軍代兄權都督鄴城守事遷安西將軍都督關中事太康初入爲散騎常侍前將軍領鄴城門校尉以疾去官後代下邳王晃爲尚書左僕射出爲鎮西將軍領護西戎校尉假節代扶風王駿都督關中軍事以疾還京師永熙初代石鑒爲司空尋領太子太保及楊駿誅秦領駿營加侍中給步兵二千五百人騎五百匹

秦固辭乃給千兵百騎楚王瑋之被收秦嚴兵將救之祭酒丁綏諫曰公爲宰相不可輕動且夜中倉卒宜遣人參審定問秦從之瑋旣誅乃以秦錄尚書事遷太尉守尚書令改封高密王邑萬戶元康九年薨追贈太傅秦性廉靜不近聲色雖爲宰輔食大國之租服飾殺膳如布衣寒士任真簡率每朝會不識者不知其王公也事親恭謹居喪哀戚謙虛下物爲宗室儀表當時諸王惟秦及下邳王晃以節制見稱雖並不能振施其餘莫得比焉秦四子越騰略模越自有傳騰出後叔父悌弟

孝王略立略字元簡孝敬慈順小心下士少有父風元
康初愍懷太子在東宮選大臣子弟有名稱者以爲賓
友略與華恒等並侍左右歷散騎黃門侍郎散騎常侍
祕書監出爲安南將軍持節都督滄南諸軍事遷安北
將軍都督青州諸軍事略逼青州刺史程牧牧避之略
自領州吏與初恚令劉根起兵東萊誑惑百姓衆以萬
數攻略於臨菑略不能距走保聊城懷帝即位遷使持
節都督荊州諸軍事征南大將軍開府儀同三司京兆
流人王道與叟人郝洛聚衆數千屯于冠軍略遣參軍

崔曠率將軍皮初張洛等討道爲道所譎戰敗略更遣
左司馬曹攄統曠等進逼道將大戰曠在後密自退走
據軍無繼戰敗死之略乃赦曠罪復遣部將韓松又督
曠攻道道降尋進開府加散騎常侍永嘉三年薨追贈
侍中太尉子據立薨無子以彭城康王子紘爲嗣其後
紘歸本宗立紘子俊以奉其祀略兄新蔡武哀王騰字
元邁少拜冗從僕射封東嬴公歷南陽魏郡太守所在
稱職徵爲宗正遷太常轉持節寧北將軍都督并州諸
軍事并州刺史惠帝討成都王穎六軍敗績騰與安北

將軍王浚共殺穎所署幽州刺史和演率衆討穎穎遣北中郎將王斌距戰浚率鮮卑騎擊斌騰爲後係大破之穎懼挾帝歸洛陽進騰位安北將軍永嘉初遷車騎將軍都督鄴城守諸軍事鎮鄴又以迎駕之勲改封新蔡王初騰發并州次於真定值大雪平地數尺營門前方數丈雪融不積騰怪而掘之得玉馬高尺許表獻之其後公師藩與平陽人汲桑等爲群盜起於清河鄆縣衆千餘人寇頓丘以葬成都王穎爲辭載穎主而行與張泓故將李豐等將攻鄴騰曰孤在并州七年胡圍城

不能尅汲桑小賊何足憂也及豐等至騰不能守率輕騎而走爲豐所害四子虞矯紹確虞有勇力騰之被害虞逐豐豐投水而死是日虞及矯紹并鉅鹿太守崔曼車騎長史羊恒從事中郎蔡克等又爲豐餘黨所害及諸名家流移依鄴者死亡並盡初鄴中雖府庫虛竭而騰資用甚饒性儉嗇無所振惠臨急乃賜將士米可數升帛各丈尺是以人不爲用遂致於禍及苟晞救鄴桑還平陽于時盛夏尸爛壞不可復識騰及三子骸骨不獲庶子莊王確立確字嗣安歷東中郎將都督豫州諸

軍事鎮許昌永嘉末爲石勒所害無子初以章武王混子滔奉其祀其後復以汝南威王祐子弼爲確後太興元年薨無子又以弼弟邈嗣確位至侍中薨子晃立拜散騎侍郎桓溫廢武陵王免晃爲庶人徙衡陽孝武帝立晃弟崇繼邈後爲奴所害子惠立宋受禪國除略弟南陽王模字元表少好學與元帝及范陽王虓俱有稱於宗室初封平昌公惠帝末拜冗從僕射累遷太子庶子貞外散騎常侍成都王穎奔長安東海王越以模爲北中郎將鎮鄴永興初成都王穎故帳下督公師藩樓權郝昌等攻鄴模左右謀應之廣平太守丁劭率衆攻模范陽王虓又遣兖州刺史苟晞援之藩等敗走遷鎮東大將軍鎮許昌進爵南陽王永嘉初轉征西大將軍開府都督秦雍梁益諸軍事代河間王顥鎮關中模感丁劭之德勅國人爲劭立生碑時關中饑荒百姓相噉加以疾癘盜賊公行模力不能制乃鑄銅人鐘鼎爲釜器以易穀議者非之東海王越表徵模爲司空遣中書監傅祗代之模謀臣淳于定說模曰關中天府之國霸王之地今以不能綏遠而還旣於聲望有虧又公兄弟

唱起大事而並在朝廷若自疆則有專權之罪弱則受制於人非公之利也模納其言不就徵表遣世子保為西中郎將東羌校尉鎮上邽秦州刺史裴苞距之模使帳下都尉陳安率衆攻苞苞奔安定太守賈疋以郡迎苞模遣軍司謝班伐疋疋退奔盧水其年進位太尉大都督洛京傾覆模使牙門趙染戍蒲坂染求馮翊太守不得怒率衆降于劉聰聰使其子粲及染攻長安模使淳于定距之為染所敗士衆離叛倉庫虛竭軍祭酒韋輔曰事急矣早降可以免模從之遂降于染染實踞護

袂數模之罪送詣粲粲殺之以模妃劉氏賜胡張本為子保立保字景度少有文義好述作初拜南陽國世子模遇害保在上邽其後賈疋死裴苞又為張軌所殺保全有秦州之地自號大司馬承制置百官隴右氏羌並從之涼州刺史張寔遣使貢獻及愍帝即位以保為右丞相加侍中都督陝西諸軍事尋進位相國模之敗也都尉陳安歸於保保命統精勇千餘人以討羌寵遇甚厚保將張春等疾之譖安有異志請除之保不許春等輒伏刺客以刺安安被創馳還隴城遣使詣保貢獻不絕愍

帝蒙塵保自稱晉王時上邽大飢士衆窘困張春奉保
之南安陳安自號秦州刺史稱藩於劉曜春復奉保奔
桑城將投于張寔寔使兵迎保實禦之也是歲保病薨
時年二十七保體質豐偉自稱重八百斤喜睡痿疾不
能御婦人無子張春立司馬瞻奉保後陳安舉兵攻春
春走瞻降于安安送詣劉曜曜殺之安迎保喪以天子
禮葬之於上邽謚曰元

范陽康王綏字子都彭越王權季弟也初爲諫議大夫
秦始元年受封在位十五年咸寧五年薨子虓立虓字
武會少好學馳譽研考經記清辯能言論以宗室選爲
散騎常侍累遷尚書出爲安南將軍都督豫州諸軍事
持節鎮許昌進位征南將軍河間王顥表立成都王穎
爲太弟爲王浚所破挾天子還洛陽虓與東平王楙鎮
東將軍周馥等上言曰自愍懷被害皇儲不建委重前
相輒失臣節是以前年太宰與臣永惟社稷之貳不可
久空所以共啓成都王穎以爲國副受重之後而弗克
負荷小人勿用而以爲腹心骨肉宜敦而猜佻荐至險
詎宜遠而讒說殄行此皆臣等不明失所宗賴遂令陛

下謬於降授雖戮臣等不足以謝天下今大駕還宮文武空曠制度荒破靡有孑遺臣等雖劣足匡王室而道路之言謂張方與臣等不同既惜所在與異又以太宰惇德允元著於具瞻每當義節輒為社稷宗盟之先張方受其指教為國效節昔年之舉有死無貳此即太宰之良將陛下之忠臣但以受性彊毅不達變通遂守前志已致紛紜然退思惟既是其不易之節且慮事翻之後為天下所罪故未即西還耳原其本事實無深責臣聞代明主未嘗不全護功臣令福流子孫自中間以來

陛下功臣初無全者非獨人才皆劣其於取禍實由於廷策之失宜不相容恕以一旦之咎喪其積年之勲既違周禮議功之典且使天下之人莫敢復為陛下致節者臣等此言豈獨為一張方實為社稷遠計且關右任重臣愚以為宜委太宰自州郡已下選舉授任一皆仰成若朝之大事廢興損益每輒疇諮此則二伯述職周召分陝之義復行於今宜遂遣方還郡令群后申志時定王室所加方官請悉如舊此則忠臣義士有勸功臣必全矣司徒戎異姓之賢司空越公族之望並忠國愛

主小心翼翼宜幹機事委以朝政安北將軍王浚佐命
之胤率身履道忠亮清正遠近所推今日之舉實有大
勲此臣等所以歎息歸高也宜特崇重之以副群望遂
撫幽朔長為北藩臣等竭力犴城藩屏皇家陛下垂拱
而四祖之業自隆日月之暉復曜矣乞垂三思察臣所
言又可以臣表西示太宰又表曰成都上失道為姦邪
所誤論王之身不宜深責且先帝遺體陛下群弟自元
康以來罪戾相尋海內凶凶今廢成都宜更封一邑許
其自新若尋有禍害既傷陛下矜慈之恩又令遠近恒

謂公族無復骨肉之情此實臣等內省悲慙無顏
海也乞陛下察臣忠款於是虓先率衆自許屯于滎陽
會惠帝西遷虓與從兄平昌公模長史馮嵩等刑白馬
叩血而盟推東海王越為盟主虓都督河北諸軍事驃
騎將軍持節鎮豫州劉喬不受越等節度乘虛破許虓
自拔渡河王浚表虓領冀州刺史資以兵馬虓入冀州
於兵又南濟河破喬等河間王顥聞喬敗斬張方傳首
於越越與虓西迎帝而顥出奔於是奉天子還都拜虓
為司徒永興三年暴疾薨時年三十七無子養模子黎

通志晉書卷之三十三
為嗣黎隨模就國於長安遇害

濟南惠王遂字子伯宣帝弟魏鴻臚丞恂之子也仕魏
關內侯進封平昌亭侯歷典軍郎將景元二年轉封武
城鄉侯督鄴城守諸軍事北中郎將五等建封祝阿伯
累遷冠軍將軍武帝受禪封濟南王泰始二年薨二子
耽緝耽嗣立咸寧三年徙為中山王是年薨無子緝繼
成都王穎以緝為建威將軍與石熙等率眾距王浚沒
於陣薨無子國除後遂之曾孫勳字偉長年十餘歲愍
帝末長安陷劉曜將令狐泥養為子及壯便弓馬能左

右射咸和六年自關右還自列云是大長秋恂之玄孫
冠軍將軍濟南王遂之曾孫略陽太守瓘之子遂拜謁
者僕射以勇聞度翼之鎮襄陽以梁州刺史授桓宣卒
請勳代之初屯西城退守武當時石虎初死中國亂雍
州諸豪帥馳告勳勳率眾出駱谷壁于懸鉤去長安二
百里遣部將劉煥攻長安又拔賀城於是關中皆殺石
虎太守令長以應勳勳兵少未能自固復還梁州永和
中張琚據隴東遣使招勳勳復入長安初京兆人杜洪
以豪族陵琚琚以勇俠侮洪洪知勳憚琚兵彊因說勳

通志晉書卷之三
五十四
曰不殺張琚關中非國家之有也勳乃僞請琚於坐殺
之琚弟走池陽合衆攻勳頻戰不利請和歸梁州後桓
溫伐關中命勳出子干道而爲苻雄所敗退屯于女媧
堡俄遷征虜將軍監關中軍事領西戎校尉賜爵通吉
亭侯勳爲政酷暴至於治中別駕及州之豪右言語忤
意即於坐梟斬之或引弓自射西土患其凶虐在州常
懷據蜀之意桓溫聞之務相綏懷以其子康爲漢中太
守勳逆謀已成憚益州刺史周撫未發及撫卒遂擁衆
入劔閣梁州別駕雍端西戎司馬隗粹並切諫勳皆不
之自號梁益二州牧成都王桓溫遣朱序討勳勳兵潰
爲序所獲及息龍子長史梁憚司馬金壹等送于溫溫
并斬之傳首京師

譙剛王遜字子悌宣帝弟魏中郎將進之子也仕魏關
內侯改封城陽亭侯參鎮東軍事拜輕車將軍羽林左
監五等建徙封涇陽男武帝受禪封譙王邑四千四百
戶泰始二年薨二子隨承隨立薨謚定王子邃嗣沒於
石勒元帝以閔王承嗣遜承字敬才少篤厚有志行拜
奉車都尉奉朝請稍遷廣威將軍安夷護軍鎮安定從

惠帝還洛陽拜游擊將軍永嘉中天下漸亂間行依征
南將軍山簡會簡卒進至武昌元帝初鎮揚州承歸建
康補軍諮祭酒愍帝徵爲龍驤將軍不行元帝爲晉王
承制更封承爲譙王太興初拜屯騎校尉加輔國將軍
領左軍將軍承居官儉約家無別室尋加散騎常侍輔
國將軍如故王敦有無君之心表疏輕慢帝夜召承以
敦表示之曰王敦頃年位任足矣而所求不已言至於
此將若之何承曰陛下不早裁之難將作矣帝欲樹藩
屏會敦表以宣城内史沈充爲湘州帝謂承曰湘州南

楚險固在上流之要控三州之會是用武之國也今以叔
父居之何如承曰臣幸託末屬身當宿衛未有驅馳之
勞頻受過厚之遇夙夜自厲思報天德君之所命惟力
是視敢有辭焉然湘州蜀寇之餘人物凋盡若上憑天
威得之所莅比及三年請從戎役若未及此雖復灰身
亦無益也於是下詔以承監湘州諸軍事南中郎將湘
州刺史初劉隗以王敦威權太盛終不可制勸帝出諸
心腹以鎮方隅故先以承爲湘州續用隗及戴若思等
並爲方岳承行達武昌釋戎備見王敦敦與之宴欲觀

其意謂承曰大王雅素佳士恐非將相才也承曰公未見知耳鉛刀豈不能一割乎承以敦欲測其情故發此言敦果謂錢鳳曰彼不知懼而學壯語此之不武何能爲也聽承之鎮時湘土荒殘公私困弊承躬自儉約乘葦茨車而傾心綏撫甚有能名敦恐其爲已患詐稱北伐悉召承境內船乘承知其奸分半與之敦尋構難遣參軍桓罷說承以劉隗專寵今便討擊請承以爲軍司以軍期上道承歎曰吾其死矣地荒人鮮勢孤援絕赴君難忠也死王事義也唯忠與義夫復何求便欲唱義

衆心疑惑承曰吾受國恩義無有貳府長史盧惺憹似有志節謂承曰王敦居分陝之任而一旦作逆天地所不容人神所痛疾大王宗室藩屏寧可從其僞邪便且電奮存亡以之於是與惺及弟前丞相掾望建昌太守長沙王循衡陽太守淮陵劉翼等共盟誓曰桓罷馳檄湘川指期至巴陵零陵太守尹奉首同義謀出軍營陽於是州之內皆同義舉乃使盧望討諸不服斬湘東太守鄭澹澹敦妹夫也敦遣南蠻校尉魏人將軍李桓田嵩等甲卒二萬以攻承承且戰且守待救於尹奉

虞望而城池不固人情震恐或勸承南投陶侃又云可
退據零桂承曰吾舉義衆志在死節寧偷生苟免爲奔
敗之將乎事之不濟其令百姓知吾心耳初安南將軍
甘卓與承書勸使固守當以兵出沔口斷敦歸路則湘
圍自解及卓軍次腊口聞王師敗績停師不進又等攻
戰日逼敦又送所得臺中人書疏令又射以示承城內
知朝廷不守莫不悵惋劉翼臨陣戰死相持百餘日城
遂沒又檻車送承荊州刺史王廙承敦旨於道中害之
時年五十九敦平詔贈車騎將軍子烈王無忌立無忌

字公壽承之難以年小獲免咸和中拜散騎侍郎累遷
屯騎校尉中書黃門侍郎江州刺史褚裒當之鎮無忌
及丹楊尹桓景等餞於版橋時王廙子丹楊丞耆之在
坐無忌志欲復讎拔刀將手刃之裒景命左右救捍獲
免御史中丞車灌奏無忌欲專殺人付廷尉科罪成帝
原情詔聽贖罪建元初遷散騎常侍轉御史中丞出爲
輔國將軍長沙相又領江夏相尋轉南郡河東二郡太
守將軍如故隨桓溫入蜀以勲賜少子愔爵廣晉伯進
號前將軍永和六年薨贈衛將軍二子恬愔恬嗣立是

為敬王恬字元愉少拜散騎侍郎累遷散騎常侍黃門
郎御史中丞值海西廢簡文帝登阼未解嚴大司馬桓
溫屯中堂吹警角恬奏劾溫大不敬請科罪溫視奏歎
曰此兒乃敢彈我真可畏也恬忠正有器局在朝憚之
遷右衛將軍司雍秦梁四州大中正拜尚書轉侍郎領
左衛將軍補吳國內史又領太子詹事恬既宗室勳望
有才用孝武帝時深杖之以為都督充青冀幽并揚州之
晉陵徐州之南北郡軍事領鎮北將軍充青二州刺史
假節太元十五年薨追贈車騎將軍四子尚之恢之允

之休之尚之嗣立是為忠王尚之字伯道初拜祕書郎遷
散騎侍郎恬鎮京口尚之為振威將軍廣陵相父憂去
職服闋為驃騎諮議參軍宗室之內世有人物王國寶
之誅也散騎常侍劉鎮之彭城内史劉洸子徐州別駕
徐放並以同黨被收將加大辟尚之言於會稽王道子
曰刑獄不可廣宜釋鎮之等道子以尚之昆季並居列
職每事杖馬乃從之兗州刺史王恭忌其盛也與豫州
刺史庾楷並稱兵以討尚之為名南連荊州刺史殷仲
堪南郡公桓玄等道子命前將軍王珣右將軍謝琰討

恭尚之距楷允之與楷子鴻戰於當利鴻敗走斬楷將
段方楷單馬奔桓玄道于以尚之爲建威將軍豫州刺
史假節一依楷故事尋進號前將軍允之爲吳國內史
恢之驃騎司馬丹楊尹休之襄城太守各擁兵馬勢傾
朝廷後將軍元顯執政亦倚以爲援元顯寵侍張法順
每宴會坐起無別尚之入朝正色謂元顯曰張法順驅
走小人有何才異而暴被拔擢當今聖世不宜如此元
顯默然尚之又曰宗室雖多匡諫者少王者尚納芻蕘
之言况下官與使君骨肉不遠蒙眷累世何可坐視得
失而不盡言因叱法順令下舉坐失色尚之言笑自若
元顯深銜之後符下西府令出勇力二千人尚之不與
曰西藩濱接荒餘寇虜無常兵止數千不足戍衛無復
可分徹者元顯尤怒會欲伐桓玄故無他及元顯稱詔
西伐命尚之爲前鋒尚之子文仲爲寧遠將軍宣城內
史桓玄至姑孰遣將馮該等攻歷陽斷洞浦焚尚之舟
艦尚之率步卒九千陣於浦上先遣武都太守楊秋屯
橫江秋奔于玄軍尚之衆潰逃于涂中十餘日譙國人
韓連丁元以告玄玄害之於建康市玄上疏以閔王不

宜絕祀乃更封尚之從弟康之爲譙縣王安帝反正追
贈尚之衛將軍以休之長子文思爲尚之嗣襲封譙郡
王文思性凶暴每違軌度多殺不辜好田獵燒人墳墓
數爲有司所糾遂與群小謀逆劉裕聞之誅其黨與送
文思付父休之令自訓厲後與休之同怨望稱兵爲裕
所敗隨休之介於姚興國除裕滅姚泓文思入魏時宗
室司馬道賜國璫等與文思同在魏魏賜國璫爵淮南
公道賜池陽子文思與道賜國璫不平而僞親之國璫
後欲外叛文思告之二人皆坐誅魏以文思爲廷尉賜

爵鬱林公後進爵譙王位懷荒鎮將卒恢之字季明歷
官驃騎將軍丹楊尹尚之爲桓玄所害徙恢之等於廣
州而於道中害之安帝反正追贈撫軍將軍休之字季
預少仕清塗以平王恭庾措功拜龍驤將軍襄城太守
鎮歷陽桓玄攻歷陽休之嬰城固守及尚之戰敗休之
以五百人出城力戰不捷乃還城攜子姪奔于慕容超聞
義軍起復還京師大將軍武陵王令監荆益梁寧秦雍
六州軍事領護南蠻校尉荊州刺史假節到鎮值桓振
復襲江陵休之戰敗出奔襄陽寧朔將軍張暢之高平

通志卷之三十一
相劉懷肅自沔攻振走之休之還鎮御史中丞王禎之
奏休之失戎免官朝廷以豫州刺史魏詠之代之徵休
之還京師拜後將軍會稽內史御史中丞阮歆之奏休
之與尚書虞嘯父犯禁嬉戲降號征虜將軍尋復為後
將軍及盧循作逆加督浙江東五郡軍事坐公事免劉
毅誅復以休之都督荆雍梁秦寧益六州軍事平西將
軍荊州刺史假節以子文思為亂上疏請解所任歸罪闕
庭不許後以文思事怨望遂結雍州刺史魯宗之將共誅
執政時休之次子文寶及兄子文祖並在都收付廷尉賜

劉裕親自征之密使遺休之治中韓延之書曰文思
事意遠近所知去秋遣康之送還司馬君者推至公之
極也而了無媿心久絕表疏此是天地所不容吾受命
西征止其父子而已彼土僑舊為之驅逼一無所問往
年郗僧施謝劭任集之等交構積歲專為劉毅規謀所
以至此今卿諸人一時逼迫本無纖釁吾虛懷期物自
有由來今在近路是諸賢濟身之日若大軍相臨交鋒
接刃蘭艾雜糅或恐不分故白此意并可示同懷諸人
延之報曰聞親率戎馬遠履西畿闔境士庶莫不恆駭

何者莫知師出之名故也辱來䟽始委以譙王前事良增嘆息司馬平西體國忠貞款懷待物以君有匡復之勲家國蒙賴推德委誠每事詢仰譙王往以微事見効猶自遜位况以大過而當默然也但康之前言有所不盡故重使胡道申白所懷道未及反已表奏廢之所不盡者命耳推寄相與正當如此有何不可便及干戈自義旗以來方伯誰敢不先相諮疇而徑表天子可謂欲加之罪其無辭乎劉裕足下海內之人誰不見足下此心而復欲誑國士天地所不容在彼不在此矣來言虛

懷期物自有由來今伐人之君啗人以利真可謂虛懷期物自有由來矣劉藩死於閭闔之門諸葛斃於左右之手甘言託語方伯襲之以輕兵遂使席上糜款懷之士聞外無自信諸侯以是為得筭良可耻也吾誠鄙劣嘗聞道於君子以平西之至德寧可無投命之臣乎假令天長喪亂九流渾濁當與臧洪游於地下耳裕視書嘆息以示將佐曰事人當如此矣宗之聞裕向荊州自襄陽就休之共屯江陵使文思及宗之子軌以兵距裕戰于江津休之大敗遂與宗之及文思奔于長安及裕平關中休

之與文思詣魏將長孫嵩降月餘休之卒于嵩軍中
魏贈休之征南大將軍右光祿大夫始平公謚曰聲允
之字季度出後叔父愔襲爵廣晉伯歷位輔國將軍
吳國宣城譙梁內史王恭庾楷桓玄等內伐也會稽王
道子命允之兄弟距搆破之元興初與兄恢之同徙廣
州於道被害義軍起追贈太常卿從弟康之以子文惠
襲爵宋受禪國除韓延之字顯宗南陽潁陽人魏司徒
暨之後也少以分義稱安帝時為建威將軍荊州治中
轉平西府錄事參軍以劉裕父名翹字顯宗延之遂字

顯宗名兒為翹以示不臣劉氏與休之俱奔姚興劉裕
入關復同奔魏魏明一八以延之為虎牢鎮將賜爵魯陽
侯初延之嘗來往柏谷塢省魯宗之墓有終焉之志因
謂其子曰河洛三代所都朝廷必當居此我死不勞向
代葬也即可就此子從其言遂葬宗之墓次延之死後
三十餘年而孝文徙都其孫數家即居於祖墓之北柏
谷塢焉惜卒無子兄恬以子允之嗣

高陽王睦字子友譙王遜之弟也魏安平亭侯歷侍御
史武帝受禪封中山王邑五千二百戶睦自表乞依六

通志卷之三十一
三十一
墓祀臯陶卨祀祀相立廟事下太常依禮典平議博士
祭酒劉熹等議禮記王制諸侯五廟二昭二穆與太祖而
五是則立始祖之廟謂嫡統承重一人得立耳假令支弟
並為諸侯始封之君不得立廟也今睦非為正統若立
祖廟中山不得並也後世中山乃得為睦立廟為後世
子孫之始祖耳詔曰禮文不明此制度大事宜令詳審
可下禮官博議乃處當之咸寧三年睦遣使募徙國內
八縣受逋逃私占及變易姓名詐冒復除者七百餘戶
冀州刺史杜友奏睦招誘逋亡不宜君國詔貶睦為丹
水縣侯及吳平太康初詔復爵以高陽郡封之為高陽
王元康元年為宗正薨於位世子蔚早卒孫毅立拜散
騎侍郎永嘉中沒於石勒隆安元年詔以譙敬王恬次
子恢之子文深繼毅後立五年薨無嗣復以高密王純
之子法蓮繼之宋受禪國除

任城景王陵字子山宣帝弟魏司隸從事安城亭侯通
之子也初拜議郎泰始元年封北海王邑四千七百戶
三年轉封任城王之國咸寧五年薨子濟立拜散騎侍
郎給事中散騎常侍輔國將軍隨東海王越在項為石

勒所害二子俱歿有二弟順斌順字子思初封晉陽亭侯及武帝受禪順歎曰事垂唐虞而假為禪名遂悲泣由是廢黜徙武威姑臧縣雖受罪流放守意不移而卒斌字子政魏中郎武帝受禪封陳王邑千七百一十戶三年改封西河咸寧四年薨謚曰繆子隱立薨子晉立

宣五王

宣帝九男穆張皇后生景帝文帝平原王幹伏夫人生汝南文成王亮琅邪武王伷清惠亭侯京扶風武王駿張夫人生梁王彤柏夫人生趙王倫汝南王亮亮及倫

別有傳

平原王幹字子良少以公子魏時封安陽亭侯稍遷撫軍中郎將進爵平陽鄉侯五等建武改封定陶伯武帝踐阼封平原王邑萬一千二百戶給鼓吹駙馬二匹加侍中之服咸寧初遣諸王之國幹有篤疾性理不恒而頗清虛靜退簡於情欲故特詔留之太康末拜光祿大夫加侍中特假金章紫綬班次三司惠帝即位進左光祿大夫侍中如故劔履上殿入朝不趨幹雖王大國不事其務有所調補必以才能雖有爵祿若不在已秩奉布

帛皆露積腐爛陰雨則出犢車而內露車或問其故對曰露者宜內也朝士造之雖通姓名必令立車馬於門外或終夕不見時有得覲與人物訓接亦恂恂恭遜初無闕失前後愛妾死既斂輒不釘棺置後空室中數日一發視或行淫穢須其尸壞乃葬之趙王倫輔政以幹爲衛將軍惠帝反正復爲侍中加大保齊王囧之平趙王倫也宗室朝士皆以牛酒勞囧幹獨懷百錢見囧出之曰趙王逆亂汝能義舉是汝之功今以百錢賀汝雖然大勢難居不可不慎囧既輔政幹詣之囧出迎拜幹入踞其牀不命囧坐謂之曰汝勿效白女兒其意指倫也及囧誅幹哭之慟謂左右曰宗室日衰惟此兒最可而復害之從今殆矣東海王越興義至洛陽往視幹幹閉門不通越駐車良久幹乃使人謝遣而自於門間闕之當時莫能測其意或謂之有疾或以爲晦迹焉永嘉五年薨時年八十會劉聰寇洛不遑贈謚有二子世子廣早卒次子求以太熙中封安德縣公散騎常侍皆爲善士遇難合門堙滅

琅邪武王佑字子將正始初封南安亭侯早有才望起

家爲寧朔將軍監守鄴城有綏懷之稱累遷散騎常侍
進封東武鄉侯拜右將軍監兗州諸軍事兗州刺史五
等初建封南皮伯轉征虜將軍假節武帝踐阼封東莞
郡王邑萬六百戶始置二卿特詔諸王自選令長伯表
讓不許入爲尚書右僕射撫軍將軍出爲鎮東大將軍
假節徐州諸軍事代衛瓘鎮下邳伯鎮御有方得將士
死力吳人憚之加開府儀同三司改封琅邪王以東莞
益其國平吳之役率衆數萬出涂中孫皓奉牋送璽綬
詣伯請降詔褒其功封其子二人爲亭侯各三千戶賜

絹六千匹頃之并督青州諸軍事加侍中之服進拜大將
軍開府儀同三司伯旣戚屬尊重加有平吳之功克已
恭儉無矜滿之色寮吏盡力百姓懷化太康四年薨時
年五十七臨終表求葬母太妃陵次并乞分國封四子
帝許之恭王觀嗣立又封次子澹爲武陵王繇爲東安
王漼爲淮陵王觀字思祖拜冗從僕射太熙元年薨時
年三十五子睿立是爲元帝中興初帝以皇子裒爲琅
邪王奉恭王祀裒早薨更以皇子煥爲琅邪王其日薨
復以皇子昱爲琅邪王即簡文帝也咸和之初旣徙封

會稽成帝又以康帝為琅邪王康帝即位封成帝長子
哀帝為琅邪王哀帝即位以廢帝為琅邪王廢帝即位
以會稽王攝行琅邪國祀簡文帝登阼琅邪王無嗣及
帝臨崩封少子道子為琅邪王道子後為會稽王更以
恭帝為琅邪王帝既即位琅邪國除武陵莊王澹字思
弘初為冗從僕射後封東武公邑五千二百戶轉前將
軍中護軍性忌害無孝友之行弟東安王繇有令名為
父母所愛澹惡之如讎遂譖繇於汝南王亮亮素與繇
有隙爰廢徙之趙王倫作亂以澹為領軍將軍澹素與

河內鄭倣倣弟侃善酒酣倣等言張華之寃澹性酗酒因
並殺之送首於倫其酗虐如此澹妻郭氏賈后內妹也
初恃勢無禮於澹母齊王囹輔政澹母諸葛太后表澹
不孝乞還繇由是澹與妻子徙遼東其子禧年五歲不
肯隨去曰要當為父求還無為俱徙陳訢歷年太妃薨
繇被害然後得還拜光祿大夫尚書太子太傅改封武
陵王永嘉末為石勒所害子哀王喆立喆字景林拜散
騎常侍亦為勒所殺無子其後元帝立皇子晞為武陵
王以奉澹祀東安王繇字思玄初拜東安公歷散騎黃

門侍郎遷散騎常侍美鬚髯性剛毅有威望博學多才事親孝居喪盡禮誅楊駿之際繇屯雲龍門兼統諸軍以功拜右衛將軍領射聲校尉進封郡王邑二萬戶加侍中兼典軍大將軍領右衛如故遷尚書右僕射加散騎常侍是日誅賞三百餘人皆自繇出東夷校尉文倣父欽為繇外祖諸葛誕所殺繇慮倣為舅家之患是日亦以非罪誅倣繇兄澹屢構繇於汝南王亮亮不納至是以繇專行誅賞澹因隙譖之亮惑其說遂免繇官以公就第坐有悖言廢徙帶方永康初徵繇復封拜宗

正卿遷尚書轉左僕射惠帝之討成都王穎時繇遭母喪在鄴勸穎解兵而降及王師敗績穎怨繇乃害之後立琅邪王覲子長樂亭侯渾為東安王以奉繇祀尋薨國除淮陵元王淮字思沖初封廣陵公食邑二千九百戶歷左將軍散騎常侍趙王倫之篡也三王起義淮與左將軍王輿攻殺孫秀因而廢倫以功進封淮陵王入為尚書加侍中轉宗正光祿大夫薨子貞王融立薨無子安帝時立武陵威王孫蘊為淮陵王以奉元王之祀位至散騎常侍無子以臨川王寶子安之為嗣宋受禪

國除

清惠亭侯京字子佐魏末以公子賜爵年二十四薨追
贈射聲校尉以文帝子機字太玄為嗣泰始元年封燕
王邑六千六百六十三戶機之國咸寧初徵為步兵校
尉以漁陽郡益其國加侍中之服拜青州都督鎮東將
軍假節以北平上谷廣寧郡一萬三百四十七戶增燕國
為二萬戶薨無子齊王囧表以子幾嗣後囧敗國除
秩風武王駿字子臧幼聰慧年五六歲能書疏諷誦經
籍見者竒之及長清貞守道宗室之中最為雋望魏

景初中封平陽亭侯齊王芳立駿年八歲為散騎常侍
侍講焉尋遷步兵屯騎校尉常侍如故進爵鄉侯出為
平南將軍假節淮北諸軍事改封平壽侯轉安東將軍
咸熙初徙封東牟侯轉安東大將軍鎮許昌武帝踐阼
進封汝陰王邑萬戶都督豫州諸軍事吳將丁奉寇芍
陂駿督諸軍距退之遷使持節都督揚州諸軍事代石
苞鎮壽春尋復都督豫州還鎮許昌遷鎮西大將軍使
持節都督雍涼等州諸軍事代汝南王亮鎮關中加袞
冕侍中之服駿善撫御有威恩勸督農桑與士卒分役

已及寮佐并將帥兵士等人限田十畝具以表聞詔遣
晉下州縣使各務農事咸寧初羌虜樹機能等叛遣衆
討之斬三千餘級進位征西大將軍開府辟召儀同三
司持節都督如故又詔駿遣七千人代涼州守兵樹機
能侯彈勃等欲先劫佃兵駿命平虜護軍文淑督涼秦
雍諸軍各進屯以威之機能乃遣所領二十部及彈勃
等面縛軍門各遣入質子安定北地金城諸胡吉軻羅
侯金多及北虜熱固等二十萬口又來降其年入朝徙
扶風王以氐戶在國界者增封給羽葆鼓吹太康初

進拜驃騎將軍開府持節都督如故駿有孝行母伏太
妃隨兄亮在官駿常涕泣思慕若聞有疾輒憂懼不食
或時委官定省少好學能著論與高顛論二孝先後文
有可稱及齊王攸出鎮駿表諫懇切以帝不從遂發疾
薨追贈大司馬加侍中假黃鉞西工聞其薨也泣者盈
路百姓爲之樹碑長老見碑莫不下拜其遺愛如此有
子十人暢歆最知名暢字玄舒封順陽王拜給事中
屯騎校尉游擊將軍永嘉末劉聰入洛不知所終歆字
弘舒武王薨後兄暢推恩請分國封歆太康中詔封新

野縣公邑千八百戶儀比縣王歆雖少貴而謹身履道
母臧太妃薨居喪過禮以孝聞拜散騎常侍趙王倫篡
立以為南中郎將齊王囧舉義移檄天下歆未知所從
嬖人王綏曰趙親而彊齊疎而弱宜從趙參軍孫洵大
言於衆曰趙王凶逆天下當共討之大義滅親古之明
典歆從之乃使洵詣囧囧迎執其手曰使我得成大節
者新野公也囧入洛歆躬貫甲冑率所領導囧以勳進
封新野郡王邑二萬戶遷使持節都督荊州諸軍事鎮
南大將軍開府儀同三司歆將之鎮與囧同乘謁陵因

說囧曰成都王至親同建大勳今宜留之與輔政若不
能耳當奪其兵權囧不從俄而囧敗歆懼自結於成都
王穎歆為政嚴刻蠻夷並怨及張昌作亂於江夏歆表
請討之時長沙王乂執政與成都王穎有隙疑歆與穎
連謀不聽歆出兵昌衆日盛時孫洵為從事中郎謂歆
曰古人有言一日縱敵數世之患公荷藩屏之任居推
轂之重拜表輒行有何不可而使姦凶滋蔓禍釁不測
豈維翰王室鎮靜方夏之謂乎歆將出軍王綏又曰昌
等小賊偏裨自足制之不煩違帝命親矢石也乃止昌

至樊城歆出距之衆潰為昌所害追贈驃騎將軍無子以兄子劭為後永嘉末沒於石勒

梁孝王彤字子微清脩恭儉無他才能以公子封平樂亭侯五等建封開平子武帝受禪封梁王及之國遷北中郎將督鄴城守事時諸王自選官屬彤坐用姦人汝陰上計吏張蕃為中大夫削一縣咸寧中復以陳國汝南南頓增封為汝國太康中代孔洵監豫州軍事加平東將軍鎮許昌頃之又以本官代下邳王晃監青徐州軍事進號中東將軍元康初轉征西將軍代秦工東都

督關中軍事領護西戎校尉加侍中進督涼州尋徵為衛將軍錄尚書事行太子太保給千兵百騎久之復為征西大將軍代趙王倫鎮關中都督涼雍諸軍事置左右長史司馬又領西戎校尉屯好時督建威將軍周處振威將軍盧播等伐氐賊齊萬年於六陌彤與處有隙促令進軍而絕其後播又不救之故處見害朝廷尤之尋徵拜大將軍尚書令領軍將軍錄尚書事彤嘗大會謂參軍王銓曰我從兄為尚書令不能啖大臠大臠故難銓曰公在此獨嚼尚難矣彤曰長史大臠為誰曰盧

播是也彤曰是家吏隱之耳銓曰天下咸是家吏便恐
王法不可復行彤又曰我在長安作何等不善因指單
衣補幘以爲清銓答曰朝野望公舉薦賢才使不仁者
遠而位居公輔以衣補幘以此爲清無足稱也彤有慙
色永康初共趙王倫廢賈后詔以彤爲太宰守尚書令
趙王倫輔政有星變占曰不利上相孫秀懼倫當亡乃
省司徒爲丞相以授彤猥加崇進欲以應之或曰彤無
權不益也彤固讓不受及倫篡位以彤爲阿衡給虎賁
百人軒懸之樂十人倫滅詔彤以太宰領司徒又代高

密王泰爲宗師永康二年薨喪葬依汝南文成王亮故
事博士陳留蔡克議謚曰彤位爲宰相責深任重屬尊
親近且爲宗師朝所仰望下所具瞻而臨大節無不可
奪之志當危事不能舍生取義愍懷之廢不聞一言之
諫淮南之難不能因勢輔義趙王倫篡逆不能引身去
朝宋有蕩氏之亂華元自以不能居官曰君臣之訓我
所司也公室卑而不正吾罪大矣夫以區區之宋猶有
不素餐之臣而况帝王之朝而有苟容之相此而不貶
法將何施謹案謚法不勤成名曰靈彤見義不爲不可

謂勤宜謚曰靈梁國常侍孫霖及彤親黨稱枉臺乃下符曰賈氏專權趙王倫篡逆皆力制朝野彤勢不得去而責其不能引身去朝義何所據克重議曰彤為宗臣而國亂不能匡主顛不能扶非所以為相故春秋譏華元樂舉謂之不臣且賈氏之酷烈不甚於呂后而王陵猶得杜門趙王倫之無道不甚於殷紂而微子猶得去之近者太尉陳準異姓之人加弟徽有射鉤之際亦得託疾辭位不涉偽朝何至於彤親倫之兄而獨不得去乎趙盾入諫不從出亡不遠猶不免於責况彤不能去

位北面事偽主乎宜如前議加其貶責以廣為臣之節明事君之道於是朝廷從克議彤故吏復追訢不已故改焉無子以武陵王澹子禧為後是為懷王拜征虜將軍與澹俱沒於石勒元帝時以西陽王羨子悝為彤嗣早薨是為殤王至是懷王子翹自石氏歸國得立是為聲王官至散騎常侍薨無子詔以武陵威王子璉為翹嗣歷永安太僕與父晞俱廢徙新安薨太元中復國子龢立薨子珍之立桓玄篡位國臣孔璞奉珍之奔于壽陽義旗初乃歸累遷左衛將軍太常卿劉裕伐姚泓請為

詔議參軍爲裕所害國除

文六王

文帝九男文明王皇后生武帝齊獻王攸城陽哀王邕
遼東悼惠王定國廣漢殤王廣德其樂安平王鑒燕王
機皇子永祚樂平王延祚不知母氏燕王機繼清惠亭
侯別有傳永祚早亡無傳

齊獻王攸字大猷少而岐嶷及長清和平允親賢好施
愛經籍能屬文善尺牘爲世楷則才望出武帝之右宣
帝每器之景帝無子命攸爲嗣從征王濂封長樂亭侯

及景帝崩攸年十歲哀動左右大見稱歎襲封武陽侯
奉景獻羊后於別第事后以孝聞復歷散騎常侍步兵
校尉時年十八綏撫營部甚有威惠五等建改封安昌
侯遷衛將軍居文帝喪哀毀過禮杖而後起左右以稻
米乾飯雜理中允進之攸泣而不受太后自往勉喻曰
若萬一加以他疾將復如何宜遠慮深計不可專守一
志常遣人逼進飲食司馬嵇喜又諫曰毀不滅性聖人
之教且大王地即密親任惟元輔匹夫猶惜其命以爲
祖宗况荷天下之大業輔帝室之重任而可盡無極之

哀與顏閔爭孝不可令賢人笑愚人幸也喜乃躬自進食收不得已爲之彊飯喜退收謂左右曰嵇司馬將令我不忘居喪之節得存區區之身耳武帝踐阼封齊王時朝廷草創而收總統軍事撫寧內外莫不景附焉詔議藩王令自選國內長史以奏議曰昔聖王封建萬國以親諸侯軌迹相承莫之能改誠以君不世居則人心偷幸人無常主則風俗僞薄是以先帝深覽經遠之統思復先哲之軌分土畫疆建爵五等或以進德或以酬功伏惟陛下應期創業樹建親戚聽使萊國自除長史

而今草創制度初立雖庸蜀順軌吳猶未賓宜俟清素乃議復古之制書比三上輒報不許其後國相上長史關典書令請求差選收下令曰忝受恩禮不稱惟憂至於官人叙才皆朝廷之事非國所宜裁也其令自上請之時王家人衣食皆出御府收表租秩足以自供求絕之前後十餘上帝又不許收雖未之國文武官屬下至士卒分租賦以給之疾病死喪賜與之而時有水旱國內百姓則加振貸須豐年乃責十減其二國內賴之遷驃騎將軍開府辟召禮同三司降身虛已待物以信常

歎公府不察吏然以董御戎政復有威克之宜乃下教
曰夫先王馭世明罰飭法鞭朴作教以正逋慢且唐虞
之朝猶須督責前欲撰次其事使粗有常懼煩簡之宜
未審其要故令劉程二君詳定然思惟之鄭鑄刑書叔
向不韙范宣議制仲尼譏之今皆如舊無所增損其常
節度所不及者隨事處決諸吏各竭乃心思同在公古
人之節如有所闕以賴股肱匡佐之規庶以免負於是
內外祇肅時驃騎當罷營兵兵士數千人戀彼恩德不
肯去遮京北主言之帝乃還收兵收每朝政大議悉心

陳之詔以比年饑饉議所節省收奏議曰臣聞先王之
教莫不先正其本務農重本國之大綱當今方隅清穆
武夫釋甲廣分休假以就農業然守相不能勤心恤公
以盡地利昔漢宣歎曰與朕理天下者惟良二千石乎
勤加賞罰黜陟幽明于時翕然用多名守計今地有餘
羨而不農者衆加附業之人復有虛假通天下之謀則
饑者必不少矣今宜嚴勅州郡檢諸虛詐害農之事督
實南畝上下同奉所務則天下之穀可復古政豈患於
暫一水旱使憂饑餒哉考績黜陟畢使嚴明畏威懷惠

莫不自厲又都邑之內游食滋多巧伎末業服飾奢麗
富人兼美猶有魏之遺弊染化日淺靡財害穀動復萬
計宜申明舊法必禁絕之使去奢即儉不奪農時畢力
稼穡以實倉廩則榮辱禮節由之而生興化反本於茲
為盛轉鎮東大將軍加侍中羽葆鼓吹行太子少傅數
年授太子太傅獻箴於太子頗寓規戒世以為工咸寧
二年代賈充為司空侍中太傅如故初攸特為文帝所
寵愛每見攸輒撫牀呼其小字曰此桃符座也幾為太
子者數矣及帝寢病慮攸不安為武帝叙漢淮南王魏

陳思王故事而泣臨崩執攸手以授帝先是太后有
既瘳帝與攸舉觴上壽攸以太后前疾危篤因歔欬流
涕帝有愧焉攸嘗侍帝疾恒有憂慮之容時人以此稱
歎之及太后臨崩亦流涕謂帝曰桃符性急而汝為兄
不慈我若遂不起恐必不能相容以是屬汝勿忘我言
及帝晚年諸子並弱而太子不令朝臣內外皆屬意於
攸中書監荀勗侍中馮紘皆諂諛自進攸素疾之勗等
以朝望在攸恐其為嗣禍必及已乃從容言於帝曰陛
下萬歲之後太子不得立也帝曰何故勗曰百僚內外

皆歸心齊王太子焉得立乎陛下試召齊王之國必舉
朝以爲不可則臣言有徵矣統又言曰陛下遣諸侯之
國成五等之制者宜從親始親莫如齊王帝既信勗
言又納統說太康三年下詔以攸爲大司馬都督青州
諸軍事侍中如故假節將本營千人親騎帳下司馬大
車皆如舊增鼓吹一部官騎滿二十人置騎司馬五人
餘主者詳案舊制施行攸不悅明年策命攸之國又詔
下太常議崇錫之物以濟南郡益齊國又以攸子寔爲
北海王於是備物典策設軒懸之樂六佾之舞黃鉞朝
車乘輿之副從焉攸知荀勗而然備已憤怨發病乞守
先后陵不許帝遣御醫診視而醫者希旨言無疾疾轉
篤猶催上道攸自震入節素具容儀疾雖困尚自整厲
舉止如常帝益疑無疾辭出仁宿嘔血而薨時年三十
六帝哭之慟馮統侍側曰齊王名過其實而天下歸之
今自薨殞社稷之福也陛下何哀之過帝收淚而止詔
喪禮依安平王故事廟設軒懸之樂配饗太廟子固
立別有傳攸以禮自尚鮮有過事就人借書必手刊其
謬然後反之加以至性過人有觸其諱者輒泣然流涕

雖武帝亦憚之每引之同處以釋言而後發三子麤贊
寔麤字景回山繼遼東王定國天康初徙封東萊王元
康中歷步兵屯騎校尉麤性驕暴使酒數陵侮象罔罔
以兄故客之罔起義兵趙王倫也麤及北海王寔繫廷尉
當誅倫太子中庶子祖納上疏言麤寔獻王之子明德
之胤宜蒙特宥以全穆親之業會孫秀死麤等悉得免
罔擁衆入洛麤於路迎之罔下即見須臾付前頓麤恚
曰吾坐爾殆死曾無安下之情及罔輔政詔以麤為散
騎常侍加大將軍領後軍侍中麤又從罔求開府罔不

許麤以是益恚密表罔專擅加左將軍王與謀共廢罔
事覺免為庶人尋詔徙麤上庸後封微陽侯永寧初上
庸內史陳鍾承罔旨害麤罔死詔誅鍾復麤封改葬以
王禮贊字景期繼廣漢殤王嘉德後年六歲太康元年
薨謚冲王寔字景深初為長樂亭侯後以贊薨又以寔
繼廣漢殤王後改封北海王永寧初為平東將軍假節
加散騎常侍代齊王罔鎮許昌嘉進安南將軍都督豫
州軍事增邑滿二萬戶未發留為侍中上軍將軍給千
兵百騎

城陽哀王卬字千秋年十歲而夭武帝踐阼以皇子景度為卬後於是追加卬封謚景度以泰始六年薨復以第五子憲繼哀王後薨復以第六子祗為東海王繼哀王後薨咸寧初又封第十三子遐為清河王以繼卬後遼東悼惠王定國年三歲薨咸寧初追加封謚齊王攸以長子蕤為嗣蕤薨子遵嗣

廣漢殤王廣德年二歲薨咸寧初追加封謚齊王攸以第五子贊紹封薨攸更以第二子寔嗣廣漢後

樂安平王鑿字大明初封臨淄亭侯武帝踐阼封樂安

王泰始中拜越騎校尉咸寧初以齊之梁鄒益封因之國服侍中之服元康初徵為散騎常侍上軍大將軍領射聲校尉尋遷使持節都督豫州軍事安南將軍代清河王遐鎮許昌以疾不行七年薨子殤王籍立薨無子齊王固以子冰紹鑿後以濟陰萬一千二百一十九戶改為廣陽國立冰為廣陽王固敗廢

樂平王延祚字大思少有篤疾不任封爵太康初詔封為樂平王尋薨無子

愍懷太子適字熙祖惠帝長子母曰謝才人幼而聰慧

武帝愛之常在左右嘗與諸皇子戲殿上惠帝來朝執諸皇子手次至太子帝曰是汝兒也惠帝乃止宮中嘗夜失火武帝登樓望之太子時年五歲牽帝裾入閣中帝問其故太子曰莫夜倉卒宜備非常不宜令照見人君也由是竒之嘗從帝觀水牢言於帝曰水甚肥何不殺以享士而使久費五穀帝嘉其意即使烹之因撫其背謂廷尉傅祗曰此兒當興我家嘗對群臣稱太子似宣帝於是令譽流於天下時望氣者言廣陵有天子氣故封為廣陵王邑萬戶以劉寔為師孟珩為友楊準馮

繇為文學惠帝即位立為皇太子盛選德望以為師傅以何劭為太師王戎為太傅楊濟為太保裴楷為少師張華為少傅和嶠為少保元康元年出就東宮又詔曰通尚幼蒙今出東宮惟當賴師傅群賢之訓其遊戲左右宜得正人使共周旋能相長益者必是使太保衛瓘之息庭司空泰息略太子太傅楊濟息必太子少師裴楷息憲太子少傅張華息禕尚書令華虞息恒與太子游戲以相輔導焉及長不好學惟與左右嬉戲不能尊敬師傅賈后素忌太子有令譽因此密勅黃門閹宦媚

諛於太子曰殿下誠可及壯時極意所欲何為恒自拘束每見喜怒之際輒嘆曰殿下不用威刑天下豈得畏服太子所幸蔣美人生男又言宜隆其賞賜多為皇孫造玩弄之器太子從之於是慢弛益彰或廢朝侍恒在後園遊戲愛埤車小馬令左右馳騎斷其鞅勒使墮地為樂或有忤犯者手自捶擊之性拘小忌不許繕壁脩牆正瓦動屋而於宮中為市使人屠酤手揣斤兩輕重不差其母本屠家女也故太子好之又令西園賣葵菜藍子雞麵之屬而收其利東宮舊制月請錢五十萬備

於衆用太子恒採取一月以供嬖寵洗馬江統陳五事以諫之太子不納語在統傳中舍人杜錫以太子非賈后所生而后性凶暴深以為憂每盡忠規勸太子脩德進善遠於讒諂太子怒使人以針著錫常所坐氈中而刺之太子性剛知賈謐恃后之貴不能假借之謐至東宮或捨之而於後庭游戲詹事裴權諫曰賈謐甚有寵於中宮而有不順之色若一旦交構大事去矣宜深自謙屈以防其變廣延賢人用自輔翼太子不能從初賈后母郭槐欲以韓壽女為太子妃太子亦欲婚韓氏以自

固而壽妻賈午及后皆不聽而為太子聘王衍小女惠
風太子聞衍長女美大而賈后為謚聘之心不能平頗以
為言謚嘗與太子圍碁爭道成都王穎見而訶謚謚愈
不平因此譖太子於后曰太子廣買田業多畜私財以
結小人者為賈氏故也密聞其言云皇帝萬歲後吾當
魚肉之非但如是也若宮車晏駕彼居大位依楊氏故
事誅臣等而廢后於金墉如反掌耳不如早為之所更
立慈順者以自防衛后納其言又宣揚太子之短布諸
廷下時朝野咸知賈后有害太子意中護軍趙俊

太子廢后太子弗聽七年六月有桑生於宮西廂日長
尺餘數日而枯十二日賈后將廢太子詐稱上不知呼
太子入朝既至后不見置於別室遣婢陳舞賜以酒棗
逼飲醉之使黃門侍郎潘岳作書草若禱神之文有如
太子素意因醉而書之命小婢承福以紙筆及書草使
太子書之文曰陛下宜自了不自了吾當入了之中宮
又宜速自了不自了吾當手了之并謝妃共要尅期而
兩發勿疑猶豫致後必茹毛飲血於三辰之下皇天許
當埽除患害立道文為王蔣為內主願成當三牲祠北

君大赦天下要䟽如律令太子醉迷不覺遂依而寫之
其字半不成既而補成之后以呈帝帝幸武乾殿召公
卿入使黃門令董猛以太子書及青紙詔曰適書如此
今賜死徧示諸公王矣有言者惟張華裴頡證明太子
賈后使董猛矯以長廣公主辭白帝曰事宜速決而群
臣各有不同若有不從詔宜以軍法從事議至日西不
決后懼事變乃表為太子為庶人詔許之於是使尚書
和郁持節解結為副又大將軍梁王彤鎮東將軍淮南
王允前將軍東武公澹趙王倫太保何劭等詣東宮廢

太子為庶人是日太子游玄圃聞有使者至改服出崇
賢門再拜受詔步出承華門乘麤犢車澹以兵仗送太
子妃王氏二皇孫于金墉城考竟謝淑妃及太子保林
蔣俊明年正月賈后又使黃門自首欲與太子為逆詔
以黃門首辭班示公卿又遣澹以千兵防送太子更幽
于許昌宮之別坊令治書侍御史劉振持節守之先是
有童謠曰東宮馬子莫聳空前至臘月纏汝髮又曰南
風起兮吹白沙遙望魯國鬱差莪千歲觸體生齒牙
南風后名沙門太子小字也初太子之廢也妃父王衍

表請離婚太子至許遺妃書曰鄙雖頑愚心念為善欲
盡忠孝之節無有惡逆之心雖非中宮所生奉事有如
親母自為太子以來勅見禁檢不得見母自宜城君亡不
見存恤恒在空室中坐去年十二月道文疾病困篤父子
之情實相憐愍于時表國家乞加徽號不見聽許疾病
既篤為之求請恩福無有惡心自道文病中宮遣左
右來視云天教呼汝到二十八日暮有短函來題言東宮
發䟽云言天教欲見汝即便作表求入二十九日早入見
國家須臾遣至中宮中宮左右陳舞見語中宮曰來吐

不快使住空屋中坐須臾中宮遣陳舞見語聞汝昨表
陛下為道文乞王不得王是成國耳中宮遙呼陳舞昨
天教與太子酒棗實持三升酒大盤棗來見與使飲酒
噉棗盡鄙素不飲酒即便遣舞啓說不堪三升之意中
宮遙呼曰汝常陛下前持酒可喜何以不飲天與汝酒
當使道文差也便答中宮陛下會同一日見賜故不敢
辭通日不飲三升酒也且實未食恐不堪又未見殿下
飲此或至顛倒陳舞復傳語云不孝那天與汝酒飲不
肯飲中有惡物邪遂可飲二升餘有一升求持還東宮

飲盡逼迫不得已更飲一升飲已體中荒迷不復自覺
須臾有一小婢持封箱來云詔使寫此文書鄙便驚起
視之有一白紙一青紙催促云陛下停待又小婢承福持
筆研墨黃紙來使寫急疾不容復視實不覺紙上語輕
重父母至親實不相疑事理如此實為見誣想衆人見
明也太子既廢非其罪衆情憤怨右衛督司馬雅宗室
之疎屬也與常從督許超並有寵於太子二人深傷之
說趙王倫謀臣孫秀曰國無適嗣社稷將危大臣之禍
必起而公奉事中宮與賈郭親密太子之廢皆云豫知

一旦事起禍必及矣何不先謀之秀言於趙王倫倫
納焉計既一定而秀說倫曰太子為人剛猛若得志之
日必肆其情性矣明公素事賈后之議皆以公為
賈氏之黨今雖欲建大功於太子太子之將含忍宿怨
必不能加賞於公當為公逼百姓之望翻覆以免罪耳
若有瑕釁猶不免誅不若遷延却期賈后必害太子然
後廢賈后為太子報讎猶足以為功乃可得志倫然之
秀因使反間言殿中人欲廢賈后迎太子賈后聞之憂
怖乃使太醫令程據合巴豆杏子丸三月矯詔使黃門

孫慮齋至許昌以害太子初太子恐見鳩恒自煮食於前慮以告劉振振乃徙太子於小坊中絕不與食宮中猶於牆壁上過食與太子慮乃逼太子以藥太子不肯服因如廁慮以藥杵推殺之太子大呼聲聞于外時年二十三將以庶人禮葬之賈后表曰適不幸喪亡傷其迷悖又早短折悲痛之懷不能自己妾私心冀其刻骨刻骨更思孝道規為稽顙正其名號此志不遂重以酸恨適雖罪在莫大猶王者子孫便以匹庶送終情實特乞天恩賜以王禮妾誠闇淺不識禮義

冒昧陳聞詔以廣陵王禮葬之及賈庶人死乃誅劉孫慮程據等使使持節兼司空衛尉伊策復皇太子位號帝為太子追服長子斬哀群臣齋表使尚書和郁率東宮官屬具告凶之制迎太子喪於許昌喪之發也大風雷電幃蓋分裂帝又為哀策臨軒使洗馬劉務告于太子之殯辭旨哀苦謚太子曰愍懷六月己卯葬于顯平陵帝感閻纘之言立思子臺故臣江統陸機並作誄頌焉太子三子彪臧尚並與父同幽金墉彪字道文永康元年正月薨四月追封南陽王臧字敬文永康元年

四月封臨淮王已巳詔立爲皇太孫還妃王氏以母之稱
太孫太妃太子官屬即轉爲太孫官屬趙王倫行太孫
太傅五月倫與太孫俱之東宮太孫自西掖門出車服侍
從皆愍懷之舊也到銅駝街宮人哭侍從者皆哽咽路
人投淚焉桑復生於西廂太孫廢乃枯永寧元年正月
趙王倫篡位廢爲濮陽王與帝俱遷金墉尋被害太
安初追謚曰哀尚字敬仁永康元年四月封爲襄陽王
永寧元年八月立爲皇太孫太安元年三月薨謚曰冲

太孫

